



CONVENIO DE COLABORACIÓN ENTRE A AXENCIA TURISMO DE GALICIA E A SAMI CATEDRAL DE SANTIAGO PARA O DESENVOLVEMENTO DUNHA ACCIÓN CULTURAL CONXUNTA NO TEMPLO DE CARA AO ANO SANTO 2021

Santiago de Compostela,

REUNIDOS

Por unha parte, D. Román Rodríguez González, en calidade de presidente da **Axencia Turismo de Galicia**, en virtude do establecido na disposición adicional primeira do Decreto 106/2018, do 4 de outubro, polo que se modifica parcialmente o Decreto 177/2016, do 15 de decembro, polo que se fixa a estrutura orgánica das consellerías da Xunta de Galicia, e o Decreto 196/2012, do 27 de setembro, polo que se crea a Axencia de Turismo de Galicia e apróbanse os seus estatutos, en relación co Decreto 97/2018, que dispón o seu nomeamento como conselleiro de Cultura e Turismo e no exercicio das facultades que resultan do artigo 3 do Decreto 196/2012.

E doutra, D. Daniel C. Lorenzo Santos, na súa condición de Apoderado Xeral da **S.A.M.I. Catedral de Santiago**, en virtude do nomeamento efectuado ante notario con data 27 de abril de 2015.

Interven en función dos seus respectivos cargos en exercicio das facultades que, para convir en nome das entidades que representan, teñen conferidas

EXPOÑEN

Primeiro.- Que a Axencia Turismo de Galicia, en virtude do disposto no artigo 9 dos seus estatutos aprobados polo Decreto 196/2012, do 27 de setembro, polo que se crea a Axencia de Turismo de Galicia e se aproban os seus estatutos, é a entidade pública instrumental do sector público autonómico de Galicia á que lle corresponde o impulso e execución da política turística da Xunta de Galicia en relación coa promoción da calidade





e innovación, o desenvolvemento, mellora, información e difusión do sector turístico galego, potenciando a devandita oferta, mediante a comercialización, información e difusión dos produtos turísticos da Comunidade galega e particularmente do produto estrela de todos os galegos, o Camiño de Santiago.

Que no exercicio das súas funcións, lle corresponde executar as medidas definidas para a promoción e fomento do sector turístico de Galicia, levar a cabo plans e programas de acción e colaborar no desenvolvemento de actuacións que lle permitan acadar os seus obxectivos.

Segundo.- Que a S.A.M.I. Catedral de Santiago de Compostela é un singular monumento, que posúe valores históricos, artísticos e culturais de alto interese que a converte nun fito único no marco do patrimonio cultural europeo e que viu recoñecida a súa importancia e valía ao formar parte singular dos bens incorporados á lista do Patrimonio mundial pola UNESCO: a Cidade Vella de Santiago de Compostela, da que constitúe o seu principal monumento e o Camiño de Santiago do que é meta e obxectivo final de peregrinación. A S.A.M.I. Catedral é un templo de culto católico sito en Santiago de Compostela, que acolle no sepulcro do Apóstolo Santiago, motivo polo cal é un dos principais destinos de peregrinación de Europa.

Terceiro.- Que Ano Santo 2021 é unha boa ocasión para dar relevancia á natureza espiritual da celebración e para evitar unha devaluación do seu sentido profundo. Isto non só é necesario para respectar a súa esencia, senón para manter a natureza do evento e da experiencia que viven as persoas peregrinas e visitantes.

É evidente que as peregrinacións ao sepulcro do Apóstolo adquiriron unha dimensión universal, ecuménica, na que o confesional non é obstáculo para a participación activa e aberta de persoas con outras concepcións da súa relixiosidade ou da súa busca espiritual.

Por iso, é importante establecer dúas premisas para unha proposta cultural en relación coa celebración xubilar na catedral de Santiago:





a) O espiritual debe ser o centro sobre o que artellar as actividades, e iso implica que a Catedral restaurada e a súa contorna adquiren un destacado protagonismo procurando, ao mesmo tempo, que a proposta cultural abra perspectivas para o coñecemento e vivencia das riquísimas expresións culturais creadas pola humanidade para satisfacer as súas ansias de transcendencia.

b) A beleza é un ben no que é factible manter o espírito ecuménico e aberto da dimensión espiritual. Por iso, no marco dunha peregrinación física, a idea de transitar o “Camiño da Beleza” considérase un lema oportuno para presidir a acción cultural do ano Santo.

As partes, dando resposta a este enfoque, coidan necesario abordar un programa cultural conxunto que desenvolva dúas liñas complementarias:

1) A creación de beleza: O ano santo 2021 debe supoñer un incremento do acervo artístico asociado á Catedral e ao fenómeno xacobeo. O estímulo á nova creación debe ter unha presenza viva nunha acción cultural digna da dimensión universal que ambos os dous acadaron.

2) A transmisión da beleza creada: O evento debe ser aproveitado para divulgar e poñer a disposición de persoas fieis, peregrinas e visitantes as riquezas xa acumuladas, cuxa actualización conecta a experiencia presente das persoas coas vivencias acumuladas por xeracións, desde hai máis de mil anos.

Concretando estes conceptos, a Catedral elaborou un programa cultural co que a Axencia Turismo de Galicia ten intención de colaborar.

Cuarto.- Que a colaboración entre a Axencia Turismo de Galicia e a SAMI Catedral responde ao interese común das partes.

A celebración do Ano Santo Xacobeo no ano 2021 constitúe para a Comunidade Autónoma de Galicia unha oportunidade de potenciación de Galicia, así como de





promoción e de reforzamento da dimensión internacional dos Camiños de Santiago e da propia comunidade, e leva consigo un amplo despregamento de actuacións en distintos ámbitos.

Así, a organización deste evento supón a planificación, programación e desenvolvemento de actuacións en materia de cultura, educación, turismo, sanidade, protección civil, patrimonio, infraestruturas, etc, entre as que se atopan as accións obxecto do presente convenio de colaboración.

Por parte da Axencia Turismo de Galicia considérase axeitado, por razóns de interese público colaborar nas actuacións obxecto do presente convenio coa SAMI Catedral, a única entidade que pode desenvolver o seu obxecto, razón pola que non é posible subscribir un convenio con ningunha outra entidade.

En consecuencia, as partes acordan subscribir o presente convenio con suxeición ás seguintes

CLÁUSULAS

Primeira.- Obxecto

O obxecto deste convenio é regular as condicións de colaboración entre a Axencia Turismo de Galicia ea SAMI Catedral de Santiago na preparación do programa cultural conxunto denominado *O Camiño da Beleza*, destinados ás seguintes finalidades:

1.- A composición dunha obra musical encargada ex profeso ao compositor Juan Durán, membro da Real Academia Galega de Belas Artes, para a cerimonia de apertura da Porta Santa, o día 30 de decembro.

2.- Os encargos das seguintes obras de creación:

-Unha misa para o día do Apóstolo a cargo do compositor Marco Frisina, maestro de capilla de la Catedral de Roma y Rector de la Basílica de Santa Cecilia en Trastévere.





-Un oratorio para a festa de Nadal, encargado ao prestixioso compositor español Ricardo Llorca.

-Unha composición para a clausura da Porta Santa que realizará o autor galego Juan Durán.

-O proxecto dunha intervención plástica na catedral, titulada Unha peregrinación interior na catedral dos camiños, encargada ao prestixioso artista español Daniel Canogar, coa música necesaria a cargo do compositor galego Fernando Buide.

3.- O financiamento da edición en lingua inglesa do proxecto editorial titulado A Catedral dos Camiños, froito dun labor de recompilación de traballos de historiadores e historiadores da arte sobre o templo e a súa posta en relación cos achádeos derivados das obras de restauración integral do templo levadas a cabo no cadro do seu Plan Director de restauración e conservación.

Segunda.- Orzamento e financiamento

O orzamento estimado para as actuacións obxecto deste convenio ascende a 130.000€ (IVE incluído), que se distribúen do seguinte xeito:

1. Encargo dunha composición para a apertura da porta santa	25.000,00€
2. Encargos obras	90.000,00€
3. Financiamento proxecto editorial	15.000,00€
TOTAL	130.000,00€

A execución realizarase nas seguintes fases:





Fase I:

- Edición en linguas estranxeiras do proxecto editorial titulado “A catedral dos Camiños” e, en formato técnico, do seu segundo Tomo sobre os labores de restauración do templo: 15.000,00 €

Fase II:

- Encargos obras de creación: 90.000,00€

Fase III:

- Encargo dunha composición para a apertura da Porta Santa: 25.000,00€

Deste orzamento, a Axencia Turismo de Galicia financiará as actividades relacionadas no cadro anterior na contía máxima de 130.000,00€, con cargo á aplicación orzamentaria 11.A2.761A.640.0, proxecto 2018 00002, dos orzamentos xerais da Comunidade Autónoma Galega para 2020. En todo caso, as achegas da Axencia Turismo de Galicia só cubrirán o custo da realización das actividades sen que a SAMI obteña beneficio ou lucro industrial algún coas mesmas.

A Axencia Turismo de Galicia procederá ao pagamento dos gastos correspondentes a favor da SAMI Catedral, unha vez que estas entidades presenten a xustificación das actuacións realizadas.

Terceira.- Compromiso das partes.

1. A SAMI Catedral comprométese a realizar as actuacións descritas na cláusula primeira, e asume as seguintes obrigas:

- Xustificar a realización da actividade.
- Incluír en toda a documentación e soportes específicos para o evento que se trata dunha actuación con financiamento da Xunta de Galicia, así como o logo do Xacobeo 2021 en todas as actividades obxecto do presente convenio de colaboración.

2. A Axencia Turismo de Galicia comprométese a colaborar no financiamento do custe das actuacións previstas, coa achega establecida na cláusula segunda, así como na definición en concreto das accións obxecto do convenio.





Cuarta.- Resultados conxuntos

O diverso material promocional elaborado en desenvolvemento das actuacións previstas neste convenio de colaboración, será de uso e titularidade común para as partes asinantes. As partes compartirán os dereitos de propiedade intelectual sobre os traballos correspondentes ás actuacións obxecto do convenio.

Calquera modificación dos resultados deberá ser autorizada polas partes, non obstante a Axencia Turismo de Galicia, no cumprimento dos seus fins institucionais, poderá utilizar libre e gratuitamente os traballos de campo, datos de todo tipo, resultados, análises, informes e conclusións que se deriven das actuacións obxecto do convenio. En todo caso, nas accións de difusión de datos e informes obtidos pola execución destas accións farase sempre referencia ao presente convenio.

Quinta.- Inexistencia de relación laboral

A subscrición do presente convenio non implicará relación laboral ou de calquera outra natureza entre a Axencia Turismo de Galicia e as persoas ou profesionais que desenvolvan as accións que constitúen o obxecto do mesmo, de xeito que non se lle poderá esixir responsabilidade algunha directa nin subsidiaria por actos ou feitos acaecidos no desenvolvemento deste.

Sexta .- Xustificación e pagamento

A achega da Axencia Turismo de Galicia, será librada, previa presentación da xustificación da execución das actuacións desenvolvidas para o que a SAMI deberá presentar a seguinte documentación, en relación ás actividades cuxa realización asumen de conformidade ao establecido na cláusula segunda:

- Memoria explicativa da actividade realizada e acreditación do cumprimento do obxecto do convenio.
- Memoria económica xustificativa do custe das actividades realizadas, que conterà:





- a) Relación clasificada dos gastos e investimentos da actividade, con identificación do acredor e do documento, o seu importe, data de emisión e, no seu caso, data de pagamento.
- b) Facturas xustificativas dos gastos efectuados xunto coas transferencias bancarias ou outra documentación acreditativa do seu pagamento.
- c) Certificacións de estar ao corrente das súas obrigas tributarias e da seguridade social e de non ter pendente débedas por ningún concepto coa Xunta de Galicia.

Para estes efectos, considerarase gasto realizado o que foi efectivamente pagado con anterioridade ao prazo de xustificación. Exceptúanse aqueles gastos cuxos pagamentos deban efectuarse nun momento posterior por axustarse aos calendarios de recadación, como os ingresos a conta do IRPF ou cotas por seguros sociais liquidables con posterioridade á data de xustificación. O importe destes ingresos ou cotas considerarase xustificado coa presentación do documento de gasto (factura ou documento equivalente) en que se reflicta o importe de retención ou cotizacións devengadas na data de xustificación. A SAMI Catedral quedarán obrigadas a presentar os documentos acreditativos da súa liquidación nos dez días seguintes ao remate dos prazos legalmente establecidos para o seu ingreso no período voluntario.

Así mesmo, deberá remitirse o detalle da documentación e soportes publicitarios nos que consten a colaboración da Xunta de Galicia e do logo do Xacobeo 2021.

A Axencia Turismo de Galicia resérvase o dereito a solicitar toda a documentación que considere precisa en relación coa xustificación do convenio.

A documentación correspondente á xustificación presentarase de forma electrónica a través da sede electrónica da Xunta de Galicia (<http://sede.xunta.gal>).

O prazo para presentar a documentación xustificativa será o **15 de decembro de 2020**.





En todo caso, unha vez rematadas cada unha das fases que se establecen na cláusula segunda, e previa presentación da documentación xustificativa prevista no número 1 desta cláusula, realizarase o pagamento do importe correspondente á citada fase, previa comprobación e conformidade das actuacións desenvolvidas.

Non se entenderá incumprida a obriga de xustificación das actuacións obxecto deste convenio no caso de variacións das contías previstas nas distintas partidas establecidas nos orzamentos estimados na cláusula segunda relativos as accións a realizar pola SAMI, cando obedezan a razóns xustificadas e as actuacións que se levaran a cabo garden relación directa co obxecto do presente convenio, e se compensen uns conceptos con outros.

No caso de que finalmente o orzamento executado fose inferior ao orzamento estimado previsto na cláusula segunda deste convenio, minorarase a achega da Axencia ao importe efectivamente xustificado.

Sétima.- Comisión de Seguimento

Para o desenvolvemento e bo fin deste convenio de colaboración constituirase unha comisión paritaria que velará polo cumprimento das obrigas das partes e adoptará cantas medidas e especificacións técnicas sexan precisas de cara a garantir a boa execución do convenio.

A Comisión concretará as actividades do programa proposto así como as condicións de financiamento para asegurar a viabilidade das mesmas, dentro da achega máxima a que se obriga a Axencia Turismo de Galicia, coa sinatura deste convenio e establecida na cláusula segunda.

A Comisión de Seguimento fará o seguimento dos traballos obxecto do convenio, así como resolverá as dúbidas que se presenten na súa execución e interpretación.





A súa actuación axustarase ao establecido na Lei 40/2015, do 1 de outubro, do réxime xurídico do sector público, e na Lei 16/2010, de 17 decembro, de organización e funcionamento da administración xeral e do sector público autonómico de Galicia.

Oitava.- Modificación do convenio

As modificacións do convenio adoptaranse por acordo expreso e escrito das partes asinantes, e de acordo cos trámites que exixa a normativa aplicable.

Así mesmo, e de conformidade co disposto no artigo 31.4 da Lei 14/2013, do 26 de decembro, de racionalización do sector público autonómico, os convenios subscritos pola Administración xeral da Comunidade Autónoma e as entidades instrumentais do sector público autonómico poderán ser obxecto de modificación cando teñan como finalidade o logro dos obxectivos de estabilidade orzamentaria e sustentabilidade financeira.

Novena.- Causas de resolución

Serán causas de resolución deste convenio:

- O incumprimento do seu obxecto.
- O incumprimento total ou parcial de calquera das cláusulas que nel se establecen.
- O transcurso do tempo estipulado sen que se culminen as actividades acordadas.
- A decisión xudicial declarativa da nulidade do convenio.
- O acordo unánime de todos os asinantes.

Décima.- Natureza xurídica, réxime xurídico e xurisdición competente

O presente convenio de colaboración formalízase ao abeiro do disposto na resolución de 8 de abril de 1991 pola que se fai público a acordo do Consello da Xunta de Galicia, do





27 de marzo de 1991, sobre convenios de cooperación con outros entes públicos e con particulares.

Este convenio ten natureza administrativa, e queda fora do ámbito de aplicación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, que os exclúe expresamente no artigo 6.2.

Seralle de aplicación o réxime determinado na Lei 39/2015, do 1 de outubro, do Procedemento Administrativo Común das Administracións Públicas; na Lei 40/2015, do 1 de outubro, do Réxime Xurídico do Sector Público, e polas demais normas en dereito administrativo aplicables ou, no seu defecto, polas derivadas do dereito privado.

As cuestións litixiosas que poidan xurdir coa interpretación, resolución e efectos do presente convenio serán resoltas pola Comisión de Seguimento do convenio, e contra os seus acordos poderase interpoñer recurso contencioso-administrativo, segundo o disposto na Lei reguladora da dita xurisdición.

Décimo primeira.- Publicidade e rexistro do convenio. Consentimento para a publicidade de datos persoais

O réxime de publicidade do convenio será o establecido na Lei 1/2016, do 18 de xaneiro, de transparencia e bo goberno, a Axencia Turismo de Galicia. A sinatura do convenio leva implícita a autorización para o tratamento necesario dos datos e a referida publicidade.

Asemade procederase a inscrición do convenio no Rexistro de Convenios, de conformidade co establecido no artigo 5 do Decreto 126/2006, do 20 de xullo, polo que se regula o Rexistro de Convenios da Xunta de Galicia.





Coa sinatura do presente convenio as partes asinantes prestan o seu consentimento para incluír e facer públicos a través do Portal de Transparencia e Goberno Aberto e do rexistro regulado no Decreto 132/2006, do 27 de xullo, os datos de carácter persoal contidos no convenio.

Décimo segunda.- Protección de datos de carácter persoal

As partes asinantes responsabilizaranse de que calquera tratamento de datos persoais que puideran levarse a cabo en virtude do mesmo se realice con absoluto respecto ás normas de seguridade e de conformidade co establecido no Regulamento 2016/179 (UE) Xeral de Protección de datos (en adiante, RXPd), na Lei Orgánica 3/2018, do 5 de decembro, de protección de datos persoais e garantía dos dereitos dixitais e demais normativa concordante.

Os datos persoais das persoas físicas asinantes do Convenio serán tratados polos asinantes unicamente para a adecuada formalización e desenvolvemento do mesmo e en base ao disposto no artigo 6.1 b) do RXPd.

Décimo terceira.- Notificación electrónica

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e, os empregados das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de Notificación Electrónica de Galicia Notifica.gal, (<https://notifica.xunta.gal>). Para poder acceder a unha notificación electrónica, o interesado deberá contar cun certificado





electrónico asociado ao NIF que figure como destinatario da notificación (persoa física ou xurídica). Así mesmo, o interesado pode autorizar a calquera outra persoa a acceder ao contido das súas notificacións.

Décimo cuarta.- Vixencia

Este convenio entrará en vigor na data da súa sinatura e terá vixencia ata o 31 de decembro de 2020.

En proba da súa conformidade, as partes asinan este convenio, por duplicado exemplar e a un só efecto, no lugar e data expresados no encabezamento.

Pola Axencia Turismo de Galicia

Pola SAMI Catedral

D. Román Rodríguez González

D. Daniel Lorenzo Santos

